



## KOMUNIKADO PA PRENSA

*Fecha*

24/9/2014

*Manager di Komunikashon*

Jhanirha Da Costa Gomez- Anita

*Adrès elektróniko*

[jhanirha.anita@gobiernu.cw](mailto:jhanirha.anita@gobiernu.cw)

**MINISTER BALBORDA TA FELISITÁ TUR KU TA LABORÁ DEN E SEKTOR IMPORTANTE  
AKI:**

### **DIA INTERNASHONAL DI MUNDU MARÍTIMO**

**Willemstad** - Dia 25 di sèptèmber 2014, Organisashon Mundial pa Asuntunan Marítimo (IMO) ta selebrá Dia Internashonal di Mundu Marítimo. Tur aña IMO ta selebrá esaki pa por duna èkstra atenshon na e sektor importante aki i na tur ku ta laborá den dje.

Outoridat Marítimo Kòrsou, ku ta forma parti di Ministerio di Tráfiko, Transporte i Planifikashon Urbano i ta bou di enkargo di Minister Balborda, ta e organisashon di gobièrnu ku ta responsabel pa asuntunan marítimo di Kòrsou.

E enfoke di e aña aki, di Dia Internashonal di Mundu Marítimo, ta riba implementashon efektivu di konvenianan internashonal riba tereno marítimo. Un konvenio ta un palabrashon entre paisnan pa atendé ku un aspekto spesífiko.

IMO ta traha i adaptá hopi konvenianan internashonal nobo. Tin mas di 50 konvenio total, manera por ehèmpel konvenianan pa prevení aksidentenan riba laman i daño na medio ambiente, konvenianan pa minimalisá e efekto negativo di aksidentenan ora nan sosodé i konvenianan ku ta sòru pa un kompensashon apropiá pa e víktimanan di aksidentenan asin'aki.

Kòrsou, komo parti di Reino Hulandes, tambe ta forma parti na diferente konvenio.

Tres konvenio importante sigur ta:

1. Safety of Life at Sea (SOLAS). E konvenio aki ta ser konsiderá komo e konvenio di mas importante internashonalmente pa loke ta trata barkunan komersial. E meta prinsipal di SOLAS ta pa spesifiká stándartnan di seguridat básiko pa konstrukshon, material i operashon di barkunan.
2. Maritime Pollution (MARPOL). Prevenshon di polushon kousa dor di barku ta meta prinsipal di e konvenio internashonal aki.
3. Standards of Training, Certification and Watchkeeping (STCW). Manera e nòmber mes ta bisa, e konvenio aki ta trata stándartnan spesífiko pa loke ta training, sertifikashon i vigilansia di tripulantenan di barku.

Implementashon efektivu di e konvenianan aki na Kòrsou ta garantisá ku nos awanan ta keda limpi i nos barkunan ta seif.

Sektor marítimo ta un parti importante di desaroyo di Kòrsou mirando ku esaki ta kontribuí na nos ekonomia. E sektor aki ta duna trabou na mas ku 3000 trahadó den diferente organisashon relashoná direktamente òf indirektamente ku e mundu marítimo.



## **KOMUNIKADO PA PRENSA**

*Fecha*

**24/9/2014**

*Manager di Komunikashon*

**Jhanirha Da Costa Gomez- Anita**

*Adrès elektróniko*

**[jhanirha.anita@gobiernu.cw](mailto:jhanirha.anita@gobiernu.cw)**

Minister Balborda i su ministerio ta felisitá Outoridat Marítimo di Kòrsou i tur ku ta laborá den e sektor riba e dia speshal aki.